

Vice-presidente di Asociacion Amigos de Colombia, Pedro Vargaz

Asociacion "Amigos de Colombia" no ta exclusivo pa miembronan di nacionalidad Colombiano so

Nan mester di mas miembronan y colaboradornan



Vice-presidente di Asociacion Amigos de Colombia, sr. Pedro Vargaz.

ORANJESTAD — Den cuadro di un acto di entrega di certificadonan di aprecio y agradecimento, vice-presidente di Asociacion Amigos de Colombia, sr. Pedro

Vargaz, a bisa cu e asociacion aki no tin ningun meta politico, ya cu nan no tin ningun afiliacion politico of religioso. Tampoco nan no ta discrimina ningun raza ni

nacionalidad, simplemente nan ta reuni pa e stimacion cu nan tin pa Colombia, ya cu nan tin e bon intencion di hiba e nomber di Colombia padilanti.

El a splica cu e asociacion aki ta carga e nomber di "Amigos de Colombia" pasobra e no ta dedica exclusivamente pa e miembronan di nacionalidad Colombiano, sino cu e ta habri pa tur hende cu lo desea forma parti di dje. "E ta forma pa hendenan cu tin simpatia pa e custumbenan di Colombia", asina sr. Vargaz a declara diabierna anochi.

Asociacion Amigos de Colombia a nace 17 aña pasa y awendia e ta agrupa e colonia mas grandi di Latinoamericano residencia na Aruba. El a bisa cu e asociacion aki su meta ta pa bira un ehempel pa asina otro colonia Latinoamericano, Europeo, y di



Potrenan di archivo relaciona cu e actividad social cu Asociacion Amigos de Colombia a celebra dia 23 di juli ultimo enconexion cu Dia di Colombia.

otro nacionalidadnan presente den e bunita isla aki, tambe nan lo por uni "pa haci cos bon".

"Nos ta uni pa haci cos bon, pa aporta y pa duna algo bek na e isla aki cu a duna nos un welcome", asina sr. Pedro Vargaz, vice-presidente di Asociacion Amigos de Colombia a declara.

El a declara tambe cu e asociacion tin varios comision entrenan di bienestar social, cultura, deporte, entretenimento y pesen nan ta pidi e colaboracion di tur hende. E ta señala cu ora nan ta realiza un evento tur hende ta pasa bon, siembargo e hendenan aki no tin un idea di tur esfuerzo cu ta wordo hinca pa un actividad asina por a resulta un exito total.

"A nos como Colombiano y como Asociacion Amigos de Colombia y como dirigente di un asociacion, nos tin un responsabilidad grandi. Nos tin un responsabilidad cu e pueblo, pa un evento lo tuma lugar di un forma safe, bon organisa, y asina evita cualkier hecho lamentabel. Dios gracias nos a logra esaki",

asina Vargaz a declara.

Cu masha satisfaccion el a declara cu nan meta ta pa organiza eventonan social caminda tur hende por sinti nan mes confortabel, y unda nan por invita nan famia pa pasa un rato agrabel y placentero. Cada aña nan por ripara presencia di mas muchanan den e tipo di evento cu nan ta organiza, unda e hendenan ta comparti cu alegria den famia.

Sr. Vargaz a bisa cu Asociacion Amigos de Colombia ta un grupo chikito pero cu empeño y bon organisa. Pero nan mester mas colaborador, y nan mester aporte economico pasobra awendia tur cos ta placa.

Danki cu nan ta conta cu un presidente cu tin bon relacion na Aruba, y esaki ta positivo ya cu e ta yuda habri porta, segun Vargaz. Pesei nan ta expresa nan mesahe di agradecimento na fundacion Lotto pa Deporte kende a facilita gratis e infraestructura di Aruba Entertainment Center pasina Asociacion Amigos de Colombia por a organisa su actividad social dia 23 di juli ultimo.